CBETA電子佛典集成

CBETA Chinese Electronic Tripitaka Collection ebook

T28n1554

入阿毘達磨論

塞建陀羅造 唐 玄奘譯

目次

- 編輯說明
- 章節目次
- 巻目次
- 001002贊助資訊

編輯說明

- 本電子書以「CBETA 電子佛典集成 Version 2022.Q3」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta..org 回報。
- <u>版權所有</u>,歡迎自由流通,但禁止營利使用。

No. 1554

入阿毘達磨論卷上

塞建陀羅阿羅漢造

三藏法師玄奘奉 詔譯

敬禮一切智, 佛日無垢輪, 言光破人天, 惡趣本心闇。 諸以對法理, 拔除法相愚, 我頂禮如斯, 一切智言藏。 劣慧妄說闇, 覆蔽牟尼言, 照了由明燈, 稽首然燈者。

有聰慧者,能具受持諸牟尼尊教之文義,由拘事業有未得退。有劣 慧者,聞對法中名義稠林便生怖畏,然俱恒有求解了心,欲令彼於 阿毘達磨法相海中深洄復處欣樂易入,故作斯論。

調善逝宗有八句義:一、色;二、受;三、想;四、行;五、識; 六、虚空;七、擇滅;八、非擇滅,此總攝一切義。

色有二種,謂大種及所造色。大種有四,謂地、水、火、風。界能持自共相或諸所造色,故名為界。此四大種,如其次第,以堅、濕、煖、動為自性,以持、攝、熟、長為業,大而是種故名大種。由此虛空非大種攝,能生自果是種義故,遍所造色故名為大。如是大種唯有四者,更無用故、無堪能故,如床座足。所造色有十一種:一、眼;二、耳;三、鼻;四、舌;五、身;六、色;七、聲;八、香;九、味;十、觸一分;十一、無表色。於大種有,故名所造,即是依止大種起義。此中眼者,謂眼識所依,以見色為用,淨色為體。耳、鼻、舌、身准此應說。色有二種,謂顯及形。如世尊說:惡顯惡形。此中顯色有十二種,謂青、黃、赤、白、煙、雲、塵、霧、影、光、明、闇。形色有八種,謂長、短、方、

圓、高、下、正、不正。此中霧者,謂地水氣。日焰名光。月星火 藥寶珠雷等諸焰名明。障光明生於中。餘色可見名影,翻此名闇。 方謂畟方。圓謂團圓。形平等名正。形不平等名不正。餘色易了, 故今不釋。此二十種,皆是眼識及所引意識所了別境。聲有二種, 謂有執受及無執受。大種為因有差別故,墮自體者名有執受,是有 覺義;與此相違名無執受。前所生者名有執受大種為因,謂語手等 聲。後所生者名無執受大種為因,謂風林等聲。此有情名、非有情 名差別為四,謂前聲中語聲名有情名,餘聲名非有情名;後聲中化 語聲名有情名,餘聲名非有情名。此復可意及不可意,差別成八。 如是八種,皆是耳識及所引意識所了別境。香有三種:一、好香; 二、惡香;三、平等香。謂能長養諸根大種名好香;若能損害諸根 大種名惡香;若俱相違名平等香。如是三種,皆是鼻識及所引意識 所了別境。味有六種,謂甘、酢、醎、辛、苦、淡別故。如是六 種,皆是舌識及所引意識所了別境。觸一分有七種,謂滑性、澁 性、重性、輕性,及冷、飢、渴。柔軟名滑,是意觸義。麁強名 滞。可稱名重,翻此名輕。由此所逼煖欲因名冷,食欲因名飢,飲 欲因名渴。此皆於因立果名,故作如是說,如說諸佛出現樂等。大 種聚中水、火增故有滑性;地、風增故有澁性;地、水增故有重 性;火、風增故有輕性;水、風增故有冷;風增故有飢;火增故有 渴。無表色者,謂能自表諸心、心所轉變差別,故名為表。與彼同 類而不能表,故名無表。此於相似立遮止言,如於剎帝利等說非婆 羅門等。無表相者,謂由表心大種差別。於睡眠覺、亂不亂心,及 無心位有善不善色相續轉不可積集,是能建立芯芻等因,是無表 相。此若無者,不應建立有苾芻等。如世尊說,於有依福業事,彼 恒常福增長。如是無表總有三種,謂律儀、不律儀、俱相違所攝 故。律儀有三種,謂別解脫、靜慮、無漏,律儀別故。別解脫律儀 復有八種:一、芯芻律儀;二、芯芻尼律儀;三、勤策律儀;四、 正學律儀; 五、勤策女律儀; 六、近事男律儀; 七、近事女律儀; 八、近住律儀。如是八種唯欲界繋。靜慮律儀,謂色界三摩地隨轉

色,此唯色界繋。無漏律儀,謂無漏三摩地隨轉色,此唯不繋。不 律儀者,謂諸屠兒及諸獵獸捕鳥捕魚、劫盜典獄、縛龍煮狗、買弶 魁膾。此等身中不善無表色相續轉。非律儀非不律儀者,謂造毘訶 羅、窣堵波、僧伽邏摩等,及禮制多、燒香散華、讚誦願等,并捶 打等,所起種種善不善無表色相續轉。亦有無表唯一剎那,依總種 類故說相續。別解脫律儀由誓願受得,前七至命盡,第八一書夜。 又前七種,捨由四緣:一、捨所學故;二、命盡故;三、善根斷 故;四、二形生故。第八律儀,即由前四及夜盡捨。靜慮律儀由得 色界善心故得,由捨色界善心故捨,屬彼心故。無漏律儀得捨亦 爾,隨無漏心而得捨故。得不律儀由作及受,由四緣故捨不律儀: 一、受律儀故;二、命盡故;三、二形生故;四、法爾得色界善 心。處中無表,或由作故得。謂殷淨心猛利煩惱,禮讚制多及捶打 等。或由受故得,謂作是念:若不為佛造曼茶羅終不先食。如是等 願。或由捨故得,謂造寺舍敷具園林施苾芻等。捨此無表,由等起 心及所作事俱斷壞故。如是無表及前所說眼等五根,唯是意識所了 別境,齊此名為初色句義。

然諸法相略有三種:一、自共相;二、分共相;三、遍共相。自共相者,如變壞故、或變礙故,說名為色。如是即說可惱壞義,如法 王說:苾芻當知,由變壞故名色取蘊。誰能變壞?謂手觸故即便變壞,乃至廣說。如能疾行故名為馬,以能行故說名牛等。分共相者,如非常性及苦性等。遍共相者,如非我性及空性等。由此方隅,於一切法應知三相。

受句義者,謂三種領納:一、樂;二、苦;三、不苦不樂,即是領納三隨觸義。從愛非愛非二觸生。身心分位差別所起,於境歡感非二為相,能為愛因故名受。如世尊說:觸緣受、受緣愛。此復隨識差別有六,謂眼觸所生受,乃至意觸所生受。五識俱生名身受,意識俱生名心受。由根差別建立五種,謂樂根、苦根、喜根、憂根、

捨根。諸身悅受及第三靜慮心悅受,名樂根。悅是攝益義。諸身不 悅受,名苦根。不悅是損惱義。除第三靜慮,餘心悅受,名喜根。 諸心不悅受,名憂根。諸身及心非悅非不悅受,名捨根。此廣分 別,如根等處。

想句義者,謂能假合相名義解。即於青黃長短等色、螺鼓等聲、沈麝等香、醎苦等味、堅軟等觸、男女等法相名義中假合而解,為尋同因故名為想。此隨識別有六,如受。小大無量差別有三,謂緣少境故名小想;緣妙高等諸大法境故名大想;隨空無邊處等名無量想。或隨三界立此三名。

行有二種,謂相應行、不相應行。相應行者,謂思、觸、欲、作意、勝解、念、定、慧、尋、伺、信、精進、慚、愧、不放逸、輕安、不害、捨、欣、厭、不信、懈怠、放逸、善根、不善根、無記根、結、縛、隨眠、隨煩惱、纏、漏、瀑流、軛、取身繫蓋及智忍等諸心所法,此皆與心所依、所緣、行相、時、事五義等故,說名相應。與此相違名不相應,謂得、非得、無想定、滅定、無想事、命根、眾同分、生、住、老、無常、名身、句身、文身等。如是相應、不相應行,總名行蘊。故大仙說:行蘊聚集如芭蕉莖。

思調能令心有造作,即是意業,亦是令心運動為義。此善、不善、無記異故,有三種別。觸調根境識和合生,令心觸境,以能養活心所為相,順樂受等差別有三。欲調希求作事業,隨順精進,謂我當作如是事業。作意調能令心警覺,即是引心趣境為義,亦是憶持曾受等,此有三種,謂學、無學、非學非無學。七有學身中無漏作意名學,阿羅漢身中無漏作意名無學,一切有漏作意名非學非無學。勝解謂能於境印可,即是令心於所緣境無怯弱義。念謂令心於境明記,即是不忘。已、正、當作謂事業義。定謂令心專注一境,即是制如猨猴心,唯於一境而轉義。毘婆沙者作如是說,如蛇在筒行便不曲,心若在定正直而轉。慧謂於法能有簡擇,即是於攝相應成就

諸因緣果;自相共相八種法中,隨其所應觀察為義。尋謂於境令心 鹿為相,亦名分別思惟。想風所繫麁動而轉,此法即是五識轉因。 伺謂於境令心細為相,此法即是隨順意識於境轉因。

信謂令心於境澄淨,謂於三寶因果相屬有性等中現前忍許,故名為 信。是能除遣心濁穢法,如清水珠置於池內,今濁穢水皆即澄清。 如是信珠在心池内,心諸濁穢皆即除遣。信佛證菩提、信法是善 說、信僧具妙行,亦信一切外道所迷緣起法性,是信事業。精進謂 於善不善法生滅事中勇悍為性,即是沈溺生死泥者能策勵心令速出 義。慚謂隨順正理白法,增上所生違愛等流心自在性,由此勢力於 諸功德及有德者恭敬而住。愧謂修習功德為先,違癡等流訶毀劣 法,由此勢力於罪見怖。不放逸謂修諸善法,違害放逸守護心性。 心堪任性說名輕安,違害惛沈隨順善法。心堅善性說名不害,由此 勢力不損惱他,能違於他樂為損事。心平等性說名為捨,捨背非理 及向理故,由此勢力令心於理,及於非理無向無背,平等而住如持 秤縷。欣謂欣尚於還滅品,見功德已令心欣慕隨順修善,心有此故 欣樂涅槃,與此相應名欣作意。厭謂厭患於流轉品,見過失已令心 厭離,隨順離染,心有此故厭惡生死,與此相應名厭作意。心不澄 淨名為不信,是前所說信相違法。心心不勇悍名為懈怠,與前所說 精進相違。不修善法為放逸,違前所說不放逸性,即是不能守護心 義。如是所說不信等三,不立隨眠及纏垢者,過失輕故、易除遣 故。

善根有三種:一、無貪,是違貪法;二、無瞋,是違瞋法;三、無癡,是違癡法,即前所說慧為自性。如是三法是善自性,亦能為根生餘善法,故名善根。安隱義是善義,能引可愛有及解脫牙故,或已習學成巧便義是善義,由此能辨妙色像故,如彩畫師造妙色像世稱為善。不善根有三種,即前所治貪、瞋、癡三。貪謂欲界五部貪,瞋謂五部瞋,癡謂欲界三十四無明,除有身見及邊執見相應無

明。如是三法是不善自性,亦能為根生餘不善,故名不善根。不安 隱義是不善義,能引非愛諸有牙故,或未習學非巧便義是不善義, 由此能辦惡色像故,如彩畫師所造不妙世稱不善。無記根有四種, 謂愛、見、慢、無明。愛謂色無色界各五部貪。見謂色無色界各十 二見,及欲界有身見邊執見。慢謂色無色界各五部慢。無明謂色無 色界一切無明,及欲界有身見、邊執見相應無明。此四無記根,是 自所許修靜慮者有三種異故:一、愛上靜慮者,二、見上靜慮者, 三、慢上靜慮者,此三皆因無明力起。毘婆沙者立無記根唯有三 種,謂無記愛、無明、慧三。疑不堅住、慢性高舉,非根法故,於 善不善義俱不記,故名無記。又不能記愛非愛果,故名無記。以不 能招異熟果故,是無記性亦能生餘無記染法或諸無記法,故名無記 根。

結有九種,謂愛結、恚結、慢結、無明結、見結、取結、疑結、嫉 結、慳結。愛結者,謂三界貪,是染著相,如融膠漆,故名為愛。 愛即是結,故名愛結。恚結者,謂五部瞋,於有情等樂為損苦,不 饒益相如辛苦種,故名為恚。恚即是結,故是名恚結。慢結者,謂 三界慢,以自方他德類差別,心恃舉相說名為慢,如傲逸者凌篾於 他。此復七種:一、慢;二、過慢;三、慢過慢;四、我慢;五、 增上慢;六、卑慢;七、邪慢。謂因族姓財位色力持戒多聞工巧等 事,若於劣謂已勝、或於等謂己等,由此令心高舉名慢。若於等謂 己勝、或於勝謂己等,由此令心高舉名過慢。若於勝謂己勝,由此 令心高舉名慢過慢。若於五取蘊執我我所,由此令心高舉名我慢。 若於未證得預流果等殊勝德中謂已證得,由此令心高舉名增上慢。 若於多分族姓等勝中謂己少劣,由此令心高舉名卑慢。若實無德謂 己有德,由此今心高舉名邪慢。如是七慢總名慢結。無明結者,謂 三界無知,以不解了為相,如盲瞽者違害明故,說名無明。此遮止 言,依對治義,如非親友、不實等言,即說怨家、虛誑語等。無明 即是結,故名無明結。見結者,謂三見,即有身見、邊執見、邪

見。五取蘊中無我我所,而執實有我我所相,此染污慧名有身見。 身是聚義,有而是身故名有身。即五取蘊,於此起見名有身見。即 **五取蘊非斷非常,於中執有斷常二相,此染污慧名邊執見,執二邊** 故。若決定執無業無業果、無解脫無得解脫道,撥無實事,此染污 慧名邪見。如是三見名見結。取結者謂二取,即見取、戒禁取。謂 前三見及五取蘊,實非是勝而取為勝,此染污慧名見取。取是推求 及堅執義。戒謂遠離諸破戒惡禁,謂受持烏雞鹿狗、露形拔髮、斷 食臥灰,或於妄執生福滅罪,諸河池中數數澡浴,或食根果草菜藥 物以自活命,或復塗灰拔頭髮等,皆名為禁。此二俱非能清淨道, 而妄取為能清淨道,此染污慧名戒禁取。諸婆羅門有多聞者,多執 此法以為淨道,而彼不能得畢竟淨,如是二取名為取結。疑結者, 謂於四聖諦令心猶豫,如臨岐路見結草人躊躇不決,如是於苦心生 **猶豫為是為非,乃至廣說。疑即是結,故名疑結。嫉結者,謂於他** 勝事令心不忍,謂於他得恭敬供養財位多聞及餘勝法心生妬忌,是 不忍義。嫉即是結,故名嫉結。慳結者,謂於己法財令心悋惜,謂 我所有勿至於他。慳即是結,故名慳結。結義是縛義,如世尊說: 非眼結色、非色結眼,此中欲貪說名為結。如非黑牛結白牛、亦非 白牛結黑牛,乃至廣說。先所說結亦即是縛,以即結義是縛義故。 然契經中復說三縛:一、貪縛,謂一切貪,如愛結相說。二、瞋 縛,謂一切瞋,如恚結相說。三、癡縛,謂一切癡,如無明結相 說。

隨眠有七種:一、欲貪隨眠;二、瞋隨眠;三、有貪隨眠;四、慢隨眠;五、無明隨眠;六、見隨眠;七、疑隨眠。此七別相,結中已說。然應依界行相部別,分別如是七種隨眠,謂貪諸欲故名欲貪。此貪即隨眠,故名欲貪隨眠。此唯欲界五部為五,謂見苦所斷乃至修所斷。瞋隨眠亦唯欲界五部為五。有貪隨眠唯色無色界各五部為十,內門轉故。為遮於靜慮無色解脫想,故說二界貪名有貪。慢隨眠通三界各五部為十五。無明隨眠亦爾。見隨眠通三界各十二

為三十六,謂欲界見苦所斷具五見,見集滅所斷唯有邪見及見取 二,見道所斷唯有邪見、見取、戒禁取三,總為十二,上二界亦爾 為三十六。疑隨眠通三界各四部為十二,謂見苦集滅道所斷。此中 欲貪及瞋隨眠,唯有部別、無界行相別。有貪、疑、慢、無明隨 眠,有界部別、無行相別。見隨眠具有界、行相部別。行相別者謂 我我所,行相轉者名有身見。斷常行相轉者名邊執見,無行相轉者 名邪見,勝行相轉者名見取,淨行相轉者名戒禁取。微細義是隨眠 義,彼現起時難覺知故。或隨縛義是隨眠義,謂隨身心相縛而轉, 如空行影水行隨故。或隨逐義是隨眠義,如油在麻、膩在摶故。或 隨增義是隨眠義,謂於五取蘊由所緣相應而隨增故。言隨增者,謂 **隨所緣及相應門而增長故。如是七種隨眠,由界、行相部差別故,** 成九十八隨眠。謂欲界見苦所斷具十隨眠,即有身見、邊執見、邪 見、見取、戒禁取、疑、貪、瞋、慢、無明。見集所斷有七隨眠, 於前十中除有身見、邊執見、戒禁取。見滅所滅所斷有七隨眠亦 爾。見道所斷有八隨眠,謂即前七加戒禁取。修所斷有四隨眠,謂 **貪、瞋、慢、無明。如是欲界有三十六隨眠。色界有三十一隨眠,** 謂於欲界三十六中除五部瞋,無色界亦爾,故有九十八隨眠。於中 八十八見所斷,十修所斷。三十三是遍行,謂界界中見苦、集所斷 諸見疑,及彼相應不共無明,餘皆非遍行。十八是無漏緣,謂界界 中見滅、道所斷邪見、疑,及彼相應不共無明。此十八種緣滅、 道,故名無漏緣,餘皆有漏緣。此中有漏緣者,由所緣相應故隨 增。無漏緣者,但於自聚由相應故隨增。九是無為緣,謂界中見滅 所斷邪見、疑,及彼相應不共無明。緣滅諦故名無為緣,餘皆有為 緣。十種隨眠次第生者,先由無明於諦不了,謂苦於不欲乃至於道 不欲。由不了故次引生疑,謂聞邪正二品便懷猶豫,為苦非苦乃至 為道非道。從此猶豫引生邪見,謂惡友由邪聞思生邪決定,無施 與、無愛樂、無祠祀,乃至廣說。從此邪見有身見生,謂取蘊中撥 無苦理,便執有我或有我所。從有身見邊執見生,謂執我有斷常邊 故。從邊執見戒禁取生,謂此邊執為能淨故。從戒禁取引見取生,

謂能淨者是最勝故。從此見取次引貪生,謂自見中情深愛故。從此 貪後次引慢生,謂自見中深著已,恃生高舉凌篾他故。從此慢後次 引瞋生,謂恃己見於他見中情不能忍必憎嫌故,或於自見取捨位中 起憎嫌故。十種隨眠次第如是。由三因緣起諸煩惱:一、未斷隨眠 故;二、非理作意故;三、境界現前故。由因加行境界三力煩惱現 前,此說具者。亦有唯依境界力起,煩亂遍惱身心相續,故名煩 惱。此即隨眠。

隨煩惱者,即諸煩惱亦名隨煩惱。復有隨煩惱,謂餘一切行蘊所攝染污心所,與諸煩惱同蘊攝故。此復云何?謂誑、憍、害、惱、恨、諂等,有無量種,如聖教說。誑謂惑他。憍謂染著自身所有色力族姓淨戒多聞巧辯等已,令心傲逸無所顧性。害謂於他能為逼迫,由此能行打罵等事。惱謂堅執諸有罪事,由此不受如理諫誨。恨謂於忿所緣事中,數數尋思結怨不捨。諂謂心曲。如是六種從煩惱生。穢污相麁名煩惱垢。於此六種煩惱垢中,誑、憍二種是貪等流,貪種類故。害、恨二種是瞋等流,瞋種類故。惱垢即是見取等流,執已見勝者惱亂自他故。諂垢即是諸見等流,諸見增多諂曲故。如說諂曲謂諸惡見,此垢及纏并餘染污行蘊所攝。諸心所法從煩惱生,故皆名隨煩惱。

纏有十種,謂惛沈、睡眠、掉舉、惡作、嫉、慳、無慚、無愧、忿、覆。身心相續無堪任性名為惛沈,是昧重義,不能任持身心相續,令心昧略,名為睡眠。此得纏名,唯依染污。掉舉謂令心不寂靜。惡所作體名為惡作。有別心所緣惡作生,立惡作名,是追悔義,此於果體假立因名,如緣空名空、緣不淨名不淨。世間亦以處而說依處者,如言一切村邑來等。此立纏名,亦唯依染。嫉、慳二相,結中已說。於諸功德及有德者令心不敬,說名無慚,即是恭敬所敵對法。於諸罪中不見怖畏,說名無愧,能招惡趣,善士所訶說名為罪。除瞋及害,於情非情令心憤發,說名為忿。隱藏自罪說名

為覆。此十纏縛身心相續,故名為纏。此中惛沈、睡眠、無愧是無明等流。惡作是疑等流。無慚、慳、掉舉是貪等流。嫉、忿是瞋等流。覆是貪無明等流。諸心所法行相微細,一一相續分別尚難,況一剎那俱時而有。微密智者依佛所說,觀果差別知其性異,為諸學者無倒宣說。有劣慧者未親承事無倒解釋佛語諸師,故於心所迷謬誹撥,或說唯三或全非有。

漏有三種,謂欲漏、有漏、無明漏。欲界煩惱并纏,除無明,名欲漏。有四十一物,謂三十一隨眠并十纏。色無色界煩惱并纏,除無明,名有漏。有五十四物,謂上二界各二十六隨眠,并惛沈、掉舉,同無記故、內門轉故、依定地故,二界合立一有漏名。三界無明名無明漏,有十五物,以無明是諸有本故,別立漏等。稽留有情久住三界,障趣解脫故名為漏。或令流轉從有頂天至無間獄,故名為漏。或彼相續於六瘡門泄過無窮,故名為漏。

瀑流有四,謂欲、有、見、無明瀑流。欲漏中除見,名欲瀑流,有二十九物。有漏中除見,名有瀑流,有三十物。三界諸見名見瀑流,有三十六物。三界相應不共無明,名無明瀑流,有十五物。漂奪一切有情勝事,故名瀑流,如水瀑流。軛有四種,如瀑流說。和合有情令於諸趣諸生諸地受苦,故名為軛。即是和合令受種種輕重苦義。

說一切有部入阿毘達磨論卷上

塞建陀羅阿羅漢造

三藏法師玄奘奉 詔譯

取有四種,謂欲取、見取、戒禁取、我語取。即欲瀑流加無明名欲取,有三十四物,謂貪、瞋、慢、無明各五,疑四,纏十。即有瀑流加無明,名我語取,有四十物,謂貪、慢、無明各十,疑八及惛沈、掉舉。諸見中除戒禁取,餘名見取,有三十物。戒禁取名戒禁取,有六物,由此獨處聖道怨故、雙誑在家出家眾故。於五見中此別立取,謂在家眾由此誑惑,計自餓、服氣及墜山巖等為天道故。諸出家眾由此誑惑,計捨可愛境受杜多功德為淨道故。薪義是取義,能令業火熾然相續而生長故,如有薪故火得熾然,如是有煩惱故有情業得生長。又猛利義是取義,或纏裹義是取義,如蠶處繭自纏而死。如是有情四取所纏,流轉生死喪失慧命。身繫有四種,謂貪欲身繫、瞋恚身繫、戒禁取身繫、此實執身繫。欲界五部貪名初身繫,五部瞋名第二身繫,六戒禁取名第三身繫,十二見取名第四身繫。種種纏縛有情自纏故名身繫,是等羂網有情身義。

蓋有五種,謂貪欲蓋、瞋恚蓋、惛沈睡眠蓋、掉舉惡作蓋、疑蓋。 欲界五部貪名初蓋,五部瞋名第二蓋,欲界惛沈及不善睡眠名第三蓋,欲界掉舉及不善惡作名第四蓋,欲界四部疑名第五蓋。覆障聖 道及離欲染并此二種加行善根,故名為蓋。

前說諸界諸趣、諸生諸地,受苦應說。云何界、趣、生、地?界有三種,謂欲界、色界、無色界。欲界有二十處,謂八大地獄:一、等活;二、黑繩;三、眾合;四、號叫;五、大號叫;六、炎熱;七、極炎熱;八、無間,并傍生、鬼界為十。有四洲人:一、贍部洲;二、勝身洲;三、牛貨洲;四、俱盧洲。有六欲天:一、四大

王眾天;二、三十三天;三、夜摩天;四、覩史多天;五、樂變化 天;六、他化自在天。合二十處。色界有十六處,謂初靜慮有二 處:一、梵眾天;二、梵輔天。第二靜慮有三天:一、少光天; 二、無量光天;三、極光淨天。第三靜慮有三天:一、少淨天; 二、無量淨天;三、遍淨天。第四靜慮有八天:一、無雲天;二、 福生天;三、廣果天;四、無煩天;五、無熱天;六、善現天; 七、善見天;八、色究竟天。合十六處。大梵無想無別處所,故非 十八。無色界雖無上下處所,而有四種生處差別:一、空無邊處; 二、識無邊處;三、無所有處;四、非想非非想處。

趣有五種:一、捺洛迦;二、傍生;三、鬼界;四、天;五、人。 生有四種,謂卵、胎、濕、化。

地有十一,謂欲界、未至、靜慮中間、四靜慮、四無色,為十一 地。欲界有頂一向有漏,餘九地通有漏及無漏前。界、趣、生一向 有漏。

智有十種,謂法智、類智、世俗智、他心智、苦智、集智、滅智、道智、盡智、無生智。於欲界諸行及彼因滅加行無間解脫勝進道,并法智地中所有無漏智,名法智。無始時來常懷我執,今創見法故名法智。於色無色界諸行及彼因滅加行無間解脫勝進道,并類智地中所有無漏智,名類智。隨法智生,故名類智。諸有漏慧名世俗智,此智多於瓶衣等世俗事轉,故名世俗智。此有二種:一、染污;二、不染污。染污者復有二種:一、見性;二、非見性。見性有五,謂有身見、邊執見、邪見、見取、戒禁取。非見者,謂疑、貪、瞋、慢、無明、忿、害等相應慧。不染污者亦有二種:一、善善,二、無覆無記。無覆無記者,非見不推度故。是慧及智,善者,若五識俱,亦非見,是慧及智。若意識俱,是世俗正見,亦慧亦智。諸定生智能了知他欲色界繫一分無漏現在相似心心所法,名

他心智。此有二種:一、有漏;二、無漏。有漏者,能了知他欲色 界繋心心所法。無漏者有二種:一、法智品;二、類智品。法智品 者,知法智品心心所法。類智品者,知類智品心心所法。此智不知 色、無為、心不相應行,及過去未來無色界繫一切根地補特伽羅勝 心心所皆不能知。於五取蘊果分有無漏智,作非常、苦、空、非我 行相轉,名苦智。於五取蘊因分有無漏智,作因、集、生、緣行相 轉,名集智。於彼滅有無漏智,作滅、靜、妙、離行相轉,名滅 智。於彼對治得涅槃道有無漏智,作道、如、行、出行相轉,名道 智。有無漏智作是思惟:苦我已知、集我已斷、滅我已證、道我已 修,盡行相轉,名盡智。有無漏智作是思惟:苦我已知不復更知, 乃至道我已修不復更修,無生行相轉,名無生智。此後二智,不推 度故非見性。他心智唯見性,餘六智通見性非見性。世俗智唯有 漏,他心智通有漏及無漏,餘八智唯無漏。滅智唯無為緣,他心、 苦、集、道智唯有為緣,餘五智通有為無為緣。苦、集智唯有漏 緣,滅、道智唯無漏緣,餘六智通有漏無漏緣。法智在六地,謂四 靜慮、未至、中間。類智在九地,謂前六地、下三無色。他心智在 四地,謂四靜慮。世俗智在一切地,餘六智,法智品者在六地,類 智品者在九地。

忍有八種,謂苦集滅道法智忍及苦集滅道類智忍,此八是能引決定智勝慧。忍可苦等四聖諦理,故名為忍。於諸忍中,此八唯是觀察法忍,是見及慧、非智自性。決定義是智義。此八推度意樂未息,未能審決,故不名智。苦法智忍與欲界見苦所斷十隨眠得俱滅,苦法智與彼斷得俱生。忍為無間道,智為解脫道,對治欲界見苦所斷十種隨眠。如有二人,一在舍內驅賊令出,一關閉門不令復入。苦類智忍與色無色界見苦所斷十八隨眠得俱滅,苦類智與彼斷得俱生,餘如前說。如是四心,能於三界苦諦現觀;於集滅道各有四心,應知亦爾。此十六心,能於三界四諦現觀,斷見所斷八十八結得預流果。餘修所斷十種隨眠,謂欲界四、色無色界各三,為十。

欲界四種譬如束蘆,總分為九,謂從上上乃至下下。彼對治道無間解脫亦有九品,謂下下品道能對治上上品隨眠,乃至上上品道能對治下下品隨眠。六品盡時得一來果,九品盡時得不還果。如欲界四,總分為九,亦有九品無間解脫能對治道;色無色界各有四地,一一地中能治所治各有九品,應知亦然。漸次斷彼八地隨眠,乃至有頂下下品盡時得阿羅漢果。四果中間所有諸道,及前見道名為四向。隨在彼果前,即名彼果向。如是有八補特伽羅,謂行四向及住四果。如是向、果,由種性別分為六種,謂鈍利根種性異生。若入見道十五心須名隨信行及隨法行。即此二種至修道位,謂從第十六心乃至金剛喻定,名信勝解及名見至。即此二種至無學位,謂從初盡智乃至最後心,名時解脫及不時解脫。等,謂心所種類差別有無量種,依心有故名心所法,猶如我所。如是心所名相應行。

不相應行與此相違,謂諸得等。得謂稱說有法者因。法有三種: 一、淨;二、不淨;三、無記。淨謂信等,不淨謂貪等,無記謂化 心等。若成此法,名有法者。稱說此定因,名得獲成就。得若無 者,貪等煩惱現在前時,有學既無無漏心故,應非聖者。異生若起 善無記心,爾時應名已離染者。又諸聖者與諸異生無涅槃得,互相 似故,應俱名異生、或俱名聖者。如法王說:起得成就十無學法故 名聖者,永斷五支,乃至廣說。又世尊說:苾芻當知,若有成就善 不善法,我見如是諸有情類,心相續中善不善得增長無邊。作如是 說:汝等苾芻,不應校量有情勝劣,不應妄取補特伽羅德量淺深, 乃至廣說。故知法外定有實得。此有二種:一者未得、已失今獲, 二者得已不失成就。應知非得與此相違。於何法中有得、非得?於 自相續及二滅中有得非得。非他相續,無有成就他身法故。非非相 續,無有成就非情法故。亦非虛空,無有成就虛空者故。彼得無 故,非得亦無。得有三種:一者如影隨形得,二者如牛王引前得, 三者如犢子隨後得。初得多分如無覆無記法,第二得多分如上地沒 生欲界結生時欲界善法得,第三得多分如聞思所成慧等,除俱生所

餘得。此中應作略毘婆娑,謂欲界繋善不善色無前生得,但有俱生 及隨後得,除眼耳通慧及能變化心,并除少分若威儀路若工巧處極 數習者,諸餘一切無覆無記法及有覆無記。表色唯有俱生得,勢力 劣故無前後得;所餘諸法一一容有前後俱得。善法得唯善,不善法 得唯不善,無記法得唯無記。欲界法得唯欲界,色界法得唯色界, 無色界法得唯無色界。無漏法得通三界及無漏法。無漏法者,謂道 諦、三無為,俱不繫故。道諦得唯無漏,非擇滅得通三界,擇滅得 色無色界。道力起者即墮彼界,無漏道力起者是無漏故。無漏法得 總說有四種:學法得唯學,無學法得唯無學,非學非無學法得有三 種。非學非無學法者,謂諸有漏及無為有漏,及非擇滅得,唯非學 非無學。擇滅得學,道力起者唯學,無學道力起者唯無學。世間道 力起者,唯非學非無學。見所斷法得唯見所斷,修所斷法得唯修所 斷。非所斷法得有三種,謂修所斷及非所斷。非所斷法者,謂道諦 及無為。道諦得唯非所斷,非擇滅得唯修所斷,不染污故、是有漏 故,故擇滅得。世間道力起者唯修所斷,無漏道力起者唯非所斷。 一切非得皆唯無覆無記性攝,非如前得有差別義。然過去未來法一 一各有三世非得,現在法無現在非得,得與非得性相違故。無有現 在可成就法,不成就故。然有過去未來非得。欲色無色界及無漏 法,一一皆有三界非得。無有非得是無漏者,非得中有異生性故。 如說:云何異生性?謂不獲聖法。不獲即是非得異名。又諸非得唯 無記性,故非無漏。

已離第三靜慮染、未離第四靜慮染,第四靜慮地心心所滅,有不相應法名無想定,雖滅一切心心所法而起此定,專為除想,故名無想。如他心智,此無想定是善第四靜慮所攝,唯非聖者相續中起求解脫想,起此定故。聖者於此如惡趣想深心厭離,此唯順定受,謂順次生受。是加行得非離染得滅定者,謂已離無所有處染,有頂心心所法滅,有不相應法能令大種平等相續,故名為定滅。是有頂地加行善攝,或順次生受、或順後次受、或順不定受。起此定已未得

異熟便般涅槃,故不定受。此定能感有頂地中四蘊異熟,彼無色故。聖者能起非諸異生,由聖道力起此定故。聖者為得現法樂住求起此定,異生於此怖畏斷滅,無聖道力故不能起。聖者於此由加行得非離染得,唯佛世尊於此滅定名離染得。初盡智時已於此定能自在起,故名為得。諸佛功德不由加行,隨欲即起現在前故。若生無想有情天中,有法能令心心所滅,名無想事。是實有物,是無想定異熟果故,名異熟生,無記性攝。即廣果天中有一勝處,如中間靜慮名無想天,生時死時俱有心想、中間無故,立無想名。彼將死時,如久睡覺還起心想,起已不久即便命終,生於欲界。將生彼者,必有欲界順後次受,決定業故。如將生彼北俱盧洲,必有能感生天之業。

先業所引六處相續無間斷因,依之施設四生五趣,是名命根,亦名 為壽。故對法說:云何命根?謂三界壽。此有實體能持煖識。如伽 他言:

壽煖及與識, 三法捨身時, 所捨身僵仆, 如木無思覺。

契經亦說:受異熟已名那落迦,乃至非想非非想處應知亦爾。若異命根無別有法,是根性攝,遍在三界。一期相續無間斷時,可依施設四生五趣。生無色界,起自上地善染污心,或起下地無漏心時依何施設,化生天趣起善染時應名為死,若起無記應復名生。撥無命根有斯大過。諸有情類同作事業、同樂欲因,名眾同分。此復二種:一、無差別;二、有差別。無差別者,謂諸有情皆有我愛,同資於食、樂欲相似。此平等因,名眾同分,一一身內各別有一。有差別者,謂諸有情界地趣生,種姓、男女、近事、苾芻、學無學等種類差別。一一身內有同事業樂欲定因,名眾同分。此若無者,聖非聖等世俗言說應皆雜亂。諸異生性異生同分有何差別?同樂欲等因,說名彼同分。異生性者,能為一切無義利因。如契經說:苾芻

當知,我說愚夫無聞異生,無有少分惡不善業彼不能造。又世尊說:若來人中得人同分,異生性於死生時有捨得義。故異生性與同分別。

諸法生時有內因力,今彼獲得各別功能,即此內因說名生相。謂法 生因總有二種:一、內;二、外。內謂生相,外謂六因或四緣性。 若無生相,諸有為法應如虛空等,雖具外因緣亦無生義。或應虛空 等亦有可生義成有為性。是大過失。由此故知別有生相。能引別果 暫時住因,說名住相。謂有為法於暫住時各有勢力,能引別果令暫 時住。此引別果勢力內因,說名住相。若無住相,諸有為法於暫住 時,應更不能引於別果。由此故知有別住相。老調衰損引果功能, 令其不能重引別果。謂有為法若無異相衰損功能,何緣不能引別 果?已更不重引,引而復引應成無窮。若爾,又應非剎那性。由此 故知別有異相。無常者謂功能損已,令現在法入過去因。謂有別法 名為滅相,今從現在墮過去世。此若無者法應不滅,或虛空等亦有 滅義。此四有為之有為相。若有此四有為相者,便名有為,非虛空 等。然世尊說:有三有為之有為相,有為之起亦可了知,盡及住異 亦可了知,為所化生厭有為故。如示黑耳與吉祥俱,住異二相合說 為一,是故定有四有為相,非即所相有為法體。若即所相有為體 者,如所相體與能相一,能相亦應展轉無異。若爾諸法滅時應生、 牛 時應滅、或全不牛,此四本相是有為故。如所相法有四隨相,謂 名生生乃至滅滅。然非無窮,以四本相各相八法,隨相唯能各相一 故。謂法生時并其自體九法俱起,自體為一,相隨相八,本相中 牛,除其自體牛餘八法。隨相中牛於九法內唯牛本牛,勢力劣故。 住異滅相應知亦爾。本相依法,隨相依隨相。法因相故得有作因, 相因隨相得有作用。作用者何?謂生住異滅。所生等者,謂引果功 能。故有為法,體雖恒有而用非常。假茲四相內外因力,用得成 故。名身、句身、文身等者,謂依語生,如智帶義影像而現。能詮 自義名名句文。即是想章字之異目。如眼識等依眼等生,帶色等義

影像而現,能了自境名等亦爾。非即語音親能詮義,勿說火時便燒 於口,要依語故火等名生,由火等名詮火等義。詮者謂能於所顯義 生他覺慧,非與義合,聲有礙故。諸記論者所執常聲,理不成故。 不應離此名句文三,可執有法能詮於義。然四種法似同一相:一、 聲;二、名;三、義;四、智。此中名者謂色等想。句者謂能詮義 究竟,如說諸惡莫作等頌,世間亦說提婆達多驅白牛來搆取乳等。 文者即是[褒-保+可]壹等字。此三各別,合集同類說之為身。如大 仙說:苾芻當知,如來出世便有名身句身文身可了知者,意說諦實 蘊處界、沙門果、緣起等法名句文身。又世尊說:如來得彼彼名句 文身者,意說如來獲得彼彼不共佛法名句文身。等,謂此中義類差 別。諸行句義,齊此應知。識句義者,謂總了別色等境事,故名為 識。即於色等六種境中,由眼等根伴助而起現在作用,唯總分別色 等境事說名為識。若能分別差別相者,即名受等諸心所法,識無彼 用但作所依。識用但於現在世有一剎那頃能有了別,此亦名意,亦 名為心。亦是施設有情本事,於色等境了別為用。由根境別說有六 種,謂名眼識乃至意識。佛於經中自說彼相,謂能了別故立識名。 由此故知了別為相。

前於思擇有為相中,說法生因總有二種:一、內;二、外。內謂生相,外謂六因或四緣性。今應思擇因緣者何?因有六種:一、相應因;二、俱有因;三、同類因;四、遍行因;五、異熟因;六、能作因。心心所法展轉相應同取一境,名相應因。如心與受等、受等與受等、受等復與心,各除其自性。諸有為法更互為果或同一果,名俱有因。如諸大種所相能相,心心隨轉更互相望。二因別者,如諸商人更相助力能過嶮路,是俱有因。諸所飲食展轉同義,是相應因。心隨轉者,謂諸心所及諸靜慮無漏律儀諸有為相,以彼與心俱墮一世、一起、一住、一滅、一果、一等流、一異熟、因善、因不善、因無記,由此十因名心隨轉。自地自部前生諸法,如種子法,與後相似為同類因。自地前生諸遍行法,與後染法為遍行因。一切

不善有漏善法,與自異熟為異熟因。諸法生時除其自性,以一切法為能作因,或唯無障、或能生故。如是六因,總以一切有為果為是所生故,謂相應、俱有因得士用果。由此勢力彼得生故,此名士用,彼名為果。同類、遍行因得等流果,果似因故說名為等,從因生故復說為流,果即等流名等流果。異熟因得異熟果,果不似因故說為異,熟謂成熟堪受用故,果即異熟名異熟果,唯有情數攝無覆無記性。能作因得增上果,此增上力,彼得生故。如眼根等於眼識等,及田夫等於稼穡等,由前增上後法得生,增上之果名增上果。擇滅無為名離繫果,此由道得非道所生,果即離繫名離繫果。

緣有四種,謂因、等無間、所緣、增上緣。除能作,餘五因名因緣。過去現在心心所法,除阿羅漢最後心等,名等無間緣。一切法名所緣緣。能作因性名增上緣。

容有礙物是虛空相,此增上力彼得生故、能有所容受是虛空性故。 此若無者,諸有礙物應不得生,無容者故。如世尊說:梵志當知, 風依虛空。婆羅門曰:虛空依何?佛復告言:汝問非理。虛空無色 無見無對,當何所依,然有光明,虛空可了。故知實有虛空無為。 此體若無,風何依住?說無色等,言何所依?因有光明,何所了 別?了龜毛等,不因此故。

眾苦永斷說名擇滅。眾苦者何?謂諸生死。如世尊說:茲芻當知, 諸有若生即說為苦,諸有即是生死別名。有若不生,名苦永斷,如 堤堰水、如壁障風,令苦不生,名為擇滅。擇謂揀擇,即勝善慧。 於四聖諦數數簡擇,彼所得滅,立擇滅名。此隨所斷體有無量,以 所斷法量無邊故。若體一者初道已得,修後諸道便應無用。若言初 證少分非全,即一滅體應有多分,一體多分與理相違。隨有漏法有 爾所量,擇滅無為應知亦爾。此說為善,應正理故。此隨道別立八 十九,隨斷遍知立有九種,若隨五部立有五種。又隨果別總立為 四,謂預流等。由斷離滅界別立三。由斷苦集及有餘依、無餘依 別,總立二種,約生死斷總立為一。如是擇滅有多異名,謂名盡、離、滅、涅槃等。如人經說:苾芻當知,四無色蘊及眼色等總名為人,於中假想說名有情,亦名意生,亦名為人、摩納婆等。此中自謂我眼等、見色等,發起種種世俗言論,謂此具壽有如是名、如是族姓,乃至廣說。苾芻當知,此唯有想、唯有言說,如是諸法皆是無常。有為緣生,由此故苦,謂生時苦、住等亦苦。於此眾苦永斷無餘,除、棄、變、吐、盡、離染、滅、寂靜、隱沒,餘不續起名永不生。此極靜妙,謂一切依除棄、愛盡、離、滅、涅槃。所言一切依除棄者,謂此滅中永捨一切五取蘊苦。言愛盡者,謂此滅中現盡諸愛。得此滅已永離染法,故名為離。獲此滅已眾苦皆息,故名為滅。證此滅已一切災患煩惱火滅,故名涅槃。

非擇滅者,謂有別法畢竟障礙未來法生,但由闕緣非由擇得。如眼 與意專一色時,餘色聲香味觸等謝。緣彼境界五識身等,由得此滅 能永障故,住未來世畢竟不生。緣闕亦由此滅勢力,故非擇滅決定 實有。如世尊說:若於爾時樂受現前,二受便滅。彼言滅者,除此 是何?定非無常及擇滅故。又契經說:苾芻當知,若得預流,已盡 地獄、已盡鬼界、已盡傍生。此言盡者是非擇滅,爾時異熟法未得 擇滅故。為初業者愛樂勤學,離諸問答略制斯論。諸未遍知阿毘達 磨深密相者,隨自意集諸戲論聚置於現前,妄構邪難欲相誹毀,彼 即謗佛所說至教。如世尊說:有二種人謗佛至教,一者不信生於憎 嫉,二者雖信而惡受持。

說一切有部入阿毘達磨論卷下

CBETA 贊助資訊

(https://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".